

■ CONVIVENZA

Arroganza en il traffic public

DA BETTINA CADOTSCH*

Questa situaziun enconuscha franc mintgin: Ins va en in bus, tschertga in plaz e dumonda per curtaschia, sch'i saja anc liber, malgrà ch'ins vesa ch'il plaz n'è atgnamain betg occupà. La resposta è savens in bufatg dar dal chau u in gea ed alura sa tschent'ins giu.

Ma avant curt ha ina giuvna respundì da fatscha en ad ina dunna pli veglia ch'ella avess pli gugent sch'ella giess a seser insanua auter. Tut perplexa ha la veglietta scurlattà il chau ed è sa tschentada sper in um. Jau era ina retscha pli enavos. Era jau hai strusch pudì crair a mias ureglias. Jau manegel, questa dunna ha bandunà il bus tschintg minutas pli tard, guardava l'entir viadi da fanestra ora e n'aveva segir betg reservà il plaz per insatgi. Tge diavel ha quella gè d'ensolver ch'ella aveva il curaschi da dir quai senza mover ils tschegls?!

Cler, mintgin sesa pli gugent sulet sin in plaz ubain sper insatgi ch'ins enconuscha. Jau era! Ma en in bus u per exempel er en in tren n'è quai simplamain betg adina pusibel. Ed uschè ditg ch'ins na reservescha betg propi



per in ami lasch'ins bain seser la gliעד.

Anc pli extrem chat jau quai en in tren durant in viadi pli lung. Jau stoss propi dir che jau ma tschent là era gugent uschia che jau poss anc stender las chommas ed jau hai era gugent sch'jau poss metter mia tastga sper mai. Ma il mument ch'jau m'accorsch ch'il tren daventa plain prend jau davent la tastga e la met giun plaun tranter ils pes. Jau ditg adina: Sch'jau sun plitost tard en il tren sun jau era leda ch'jau poss anc seser giu insanua e na stoss betg star sin pes. Ma enorm blers han simplamain in'arroganza e guardan mo per sasezs. Atgnamain fissi dad ir vi e dir ch'i duessan far plaz, ma per far quai n'hai jau lura savens era nagina motivaziun.

Fadia hai jau era cun gliעד che sa cumporta en il tren sco en l'atgna stiva. Gliעד che tira ora la vestgadira, metta ils pes sin il plimatsch, mangia dal tut, bagliaffa sur da mintga problem u telefonescha uschè dad aut ch'er ils cunviagiaturs che na vulan atgnamain betg tadlar chapeschan tut. Stgisa, ma ins n'è betg sulet en in tal tren?! Na, simplamain betg! Ins po discurre er in zic pli da bass e seser in pau sco la gliעד.

Savens sun jau leda ch'jau hai buns uregliers e buna musica sin miu telefonin cura ch'jau vom cun tren. Jau sun plitost quieta en il tren. Ina discreta. Era sch'jau sun in uman avert che tschantscha fitg gugent datti muments ch'jau hai gugent mes ruaus. Per exempel il glindesdi cura ch'jau stoss ir a scola giu Turitg hai jau gugent mes café, in bun cudesch ed in pau musica. E sch'insatgi sesa giu visavi, sun jau leda, sch'igl è ina persuna che dovra il tren sco lieu per ir dad A a B e betg per marcar in revier e seser lad e patgific sco sch'ella fiss a chasa.

* Bettina Cadotsch è creschida si a Savognin. Ella studegia Multimedia Production a la Scuola auta da tecnica e d'economia a Cuir e lavura tar Radio Südostschweiz e «suedostschweiz.ch».